

清詩紀事初編

下



鄧之誠
撰

清诗纪事初编

鄧之誠 撰



下



清詩紀事初編卷五

甲編下

陶蔚 麤響一卷

陶蔚。號卷翁。寶應人。激子。少從葉燮讀書于橫山。集中有過二棄草堂拜已畦先生主六首。自注云。小山後一室。舊題曰獨立蒼茫處。先生主在焉。又學畫于石濤。有贈大滌老人詩。自注。卽苦瓜也。忽蓄髮爲黃冠。題其堂曰大滌。同人遂以此呼之。然則大滌子乃道士之稱。今人與苦瓜混而爲一誤矣。家貧。游學四方。嘗客張玉書所。有夜坐偶題與諸同學云。列炬分編丙夜中。紛紛佔畢競雕蟲。不知何與絲綸事。逐字平章屬相公。自注。時纂修佩文韻府諸書。凡在詞臣。各有分職。雖首輔亦晝夜不遑。康熙四十九年。知郟縣。當官十閱月。褫職。經歲不得東歸。未知所坐。有書事云。封疆連帥任。衆目豈能欺。一物歸私橐。千秋生大疑。獅糖難飾說。薏米亦支詞。誰似楊夫子。中宵凜四知。則由索賄不遂所致也。撰麤響一卷。自序云。自庚申^{康熙十九年}歷今三十二年。有閩天樓集二十卷。古近體一千四百十首。辛卯^{五十年}秋。將自涇陽東歸。悉檢出焚之。亡子曾武有錄存本四百六十二首。不忍沒其意。更名麤響。蓋傷之也。其詩學激而辭無不達。語語凌厲則過之。自謂俗人所不愛之作。實則過于詆訐。不知何與絲綸事一首。使有怨家

告發。恐較汪景祺天子揮豪不值錢詩。所傷尤甚。亦幸而免耳。

擊柝謠

城中聚嘯夜爲虐。夜夜戒嚴傳擊柝。五日循環坐十家。柝聲聒耳疑風鶴。富家重門高大牆。千方百計保厚藏。貧家一室空四壁。擊柝之役何倉皇。瓦燈半滅長街路。苦犬哭天鴉失樹。雙髀走斷眼血枯。幾番失點官曹怒。君不見。擔夫覓食初息肩。茫茫遙夜不得眠。天明父子對相哭。缺少今夜燈油錢。雲

苦寒行

丁卯冬。入都道中作。

僕夫催我起。起視夜未央。雞鳴殺殘漏。結束心倉皇。篝燈猶在壁。孤光照我牀。籠手低鞭悵行路。身未出門足已僵。出門就古道。不見古道唯見霜。霜濃馬蹄滑。砂土隨風狂。人命豈金石。耐茲途路長。不學灌園住鄉里。胡爲愛挈風塵裝。吐氣凍結髭鬚蒼。宿酒不熱酸辛腸。君不見。破村老媪尤太苦。曉寒炙火呼賣漿。雲

關中雜詩三首

壬申以前。西安鳳翔二郡事。

西鳳遊奇虐。億姓恆苦飢。飢死不暇掩。共與溝壑期。大野絕糧粒。觸目唯見屍。昏夜飼狐鼠。白日栖鷲鴟。稔歲艱積儲。大殺無可支。催科竭其髓。漁奪枯其脂。先時不爲保。後時何及之。叫閭誰爲憐。吁嗟良有司。屍滿野

束手閉門泣。並日無炊煙。棄此各流散。匍匐不可前。夕死難自料。那復求生全。鬻身婦何從。鬻婦心愴

然。剝肉拋向人。出淚流血鮮。觸地土爲痛。擗胸呼老天。花落冀復開。月缺有時圓。生離難再面。相與期

重泉。變婦詞

關西千里野。旱魃久廢耕。杲日照阡陌。赤地草不萌。金錢賤如糞。百穀資以生。粒粒係民命。待斃安所營。使節從東來。運粟車縱橫。疆者得以食。弱者烏能鳴。浮雲載行雨。被之有枯榮。願言均沛澤。慰茲黎

庶情。賑粟謠

摘柳謠

沙河縣

沙河水落沙吹灘。曉日照耀沙光寒。民間田災失耕播。近年日食多艱難。仰天束手歎無策。耳聾目瞶饑腸寬。榆皮草根覓食盡。摘取柳葉充朝餐。官柳行行種古陌。三春葉出陰成團。作羣婦孺就匍匐。攜筐負莧遙相看。經營努力謀一飽。猿猴臂引虛空盤。柳眼初開著雨嫩。樹頭葉盡枝如刊。家家計算救生活。迢迢十里陰凋殘。我問老嫗食此慣。水淘作塊濡之乾。但能入口少緩死。那辨滋味甜鹹酸。嗟哉此法罕聞見。食譜漏略尋無端。眼前瘡痍臥不起。身肉可補誰當剜。君不見。保釐大府厚祿俸。囊攜橐載民脂殫。烹蒸割鮮下箸厭。庖人私祝生喜懽。似此嗷嗷遍大野。當須粒食相遺安。吁嗟嘻。君門雖高尚可啓。當須粒食遺民安。囊

隄上謠

汴州城郭大如斗。黃河北護繞東走。河外層層築大隄。隄邊緣綠樹多楊柳。白髮老翁柳下立。悵望隄前暗

垂泣。我問老翁泣何事。老翁欲言淚轉急。汴州自昔稱雄都。高門邃屋千百衢。丁男在籍記萬萬。笙歌叢裏爲懽娛。家家共樂太平世。倉箱狼籍多豐歲。皇天轉眼屢降災。國運顛連遘末季。忽傳『流賊』闖王來。紛紛殺掠經幾回。排山倒海久盤踞。千村萬落俱爲灰。崇禎壬午薄城下。兵戈密密鬼神怕。忽然掘水直灌城。是時九月十七夜。須臾滿城水滿天。家家命與波濤連。我赴城頭苟延命。老弱盡死我壯年。高城倏忽水衝破。沙土淤填屋角過。屍山委積沙土中。萬死一生能幾箇。至今舊蹟俱荒丘。新城築在舊城頭。舊人似我亦罕見。話來惹我彌天愁。語罷老翁失聲哭。行子聞之亦顰蹙。賴此長隄防未然。長官下令時增築。燹

觀黃童所畫覆載一統圖

餘姚人。名千人。時年十三。從其尊翁竹農先生遊京師。

姚江學統溯往代。黃氏述作由家傳。名山書卷積數世。國門紙貴爭高懸。遠追墳典崇六籍。諸子集說皆旁淹。仰窺青穹俯大塊。時從掌握精窮研。神童十三更奇特。玉含在璞珠藏淵。薰陶家學無不有。畫天量地尤能專。繪圖覆載一統象。縮歸便面殊方圓。蠅頭瑣屑細書註。萬無一漏驅毫顛。渾天儀形徑數寸。週遭分野推星躔。紫微垣中北辰次。角亢諸宿沿旁邊。三百六十五數度。赤黑二道中盤旋。河漢互空視微渺。日月出入寒暑遷。安排位置多不爽。貫通七政能司權。人生日日井底坐。何期咫尺觀遙天。坤軸廣遠浮一撮。六合外內同幅幘。東西南朔列中土。條分幹引爲因緣。五嶽分峙五方鎮。中流四瀆疏咽喉。九有畸零八表錯。險關絕隘通人烟。窮荒之服四海窟。六幽屬國知幾千。何曾足跡去家塾。能於簡冊窺其全。

我覽此圖忽辭舌。自慚壯大非髫年。仰觀象緯一管見。山川遍歷徒憂煎。羨爾讀書得領要。恥談雜藝羞拘牽。慧心敏手寫成竹。譬之漁者都忘筌。遭逢盛世難避影。會須側席承明前。吁嗟帖括豈實用。世間兒子皆徒然。雲

喬 萊 直廬集一卷使粵集一卷歸田集一卷

喬萊。字子靜。號石林。寶應人。康熙四年進士。官中書。擢禮部主事。試己未鴻博。授編修。官至侍讀。歸。卒于三十三年。年五十三。事具清史列傳文苑傳。著直廬集一卷。皆所爲文賦。同試汪琬爲之序。盛稱其賦心之工。謂有良史才。使粵集一卷。則康熙二十一年。典廣西鄉試。途中往返之詩。附使粵日記。使粵贈言。王士禛稱其詩奇秀峭拔。善于敘致。歸田集一卷。爲二十六年南歸後所爲文。嘗修縣志。因以人物志入此集。滄桑間如余增遠梁以樟事賴以參稽。餘則孫承宗墓表。最有關係。蓋萊頗知讀書。究心經世之學。嘗著易俟二十卷。推求人事。參以古今治亂得失。故詩文皆有實際。尤善論事。康熙初歲歲河患。河臣靳輔主置閘築堤束水注海。萊疏陳四不可議以阻之。爭論得失。至于角黨。紛紜累載。遂奉特旨來京居住。入都卽以憂死。萊父可聘明季官河南道御史。有直聲。入清高蹈不仕。年過八十。係東南人望。築柘溪草堂及陶園以聚賓客。萊復得白田隙地修縱櫛園。父子繼盛。文采又足以彰之。爲時所忌。殆由此也。

過應山縣弔楊大洪先生

嗚呼有明神宗之季國晚艱。光宗繼之更短折。維時先生官給事。顧命乃與大臣列。防微肩鉅定大計。選侍移宮一朝決。再起中丞赴雙闕。大柄已被閹人竊。乾兒義孫滿廟廊。二十四罪憤所切。赤縣爭高官者祠。彤廷遍染忠臣血。詎有婪臧楊大洪。舍人寧死心如鐵。或言漢之廚顧潔其名。唐之牛李營其穴。宋之蜀洛明東林。黨禍紛紛蹈覆轍。封疆已被門戶悞。遂譏先生太激烈。假使君子不與小人爭。遂與張禹孔光更何別。君子豈能禍國家。目爲黨人正氣絕。嗚呼正氣絕。國乃滅。使粵集

長沙弔賈太傅

暴秦燔詩書。炎漢起庸保。六國燼既收。三代法如掃。吏但治申韓。后亦嗜黃老。曆仍水德訛。儀襲綿葛巧。封建踰古制。法度鮮深考。將相皆軍吏。非知仁義好。年少得賈生。挺出殊矯矯。豈惟絳灌怒。頓覺蕭曹小。他年七國禍。聽生苦不早。未覩因革宜。翻議紛更擾。騷屑去闕廷。卑涇栖荒嶠。臨流弔屈平。止舍愁服鳥。拓廉伯夷貪。鼎棄康匏寶。再逢宣室召。更值懷王夭。命也君如何。天乎余未曉。最難逢聖明。乃亦就枯槁。枯槁不足云。漢制終草草。使粵集

水車

齒齒灘中石。硃研峙當路。滿目皆危機。對之心所怖。世人多巧思。到此發奇悟。借彼撞擊力。製茲灌溉具。竹截虛如瓶。輪轉機肖轂。輕圓圭角稀。翻覆俄頃寓。既無觸石危。更得引流注。建瓴良可樂。抱甕何

其悞。使粵集

過高郵

萬里渡瀟湘。洞庭一葦鴛。不圖返故鄉。蒼茫與之亞。崩奔萬雷鳴。滌沆一川瀉。浩浩無陵谷。湯湯兼冬夏。孩提飽虺蛇。鵝鴨栖桑柘。舴艋婦子巢。場圃魚龍舍。買薪須論斤。賣兒不計價。古人貴防川。蟻穴嚴一罅。如何村落間。滾流匯其下。耕鑿計已休。畚鍤役未罷。死者長已矣。壯者不得暇。哀哉此蒼生。誰將奇禍嫁。使粵集

案此詩作于康熙二十一年壬戌。

王式丹樓村詩集二十五卷

王式丹。字方若。寶應人。康熙四十二年舉進士第一。殿試復以一甲第一人及第。授編修。修書武英殿。以重聽不爲聖祖所喜。五十二年罷官歸。卒于五十七年。年七十四。事具從子懋竝所撰行狀。撰樓村詩集二十五卷。自康熙三十年辛未迄四十五年丙戌。分六集。式丹少有詩名。嘗從葉燮田雯游。以詩受知王士禛。而詩格不類。宋犖選其詩爲江左十五子詩之首。而去其涉及時政得失人物臧否者。式丹與姜宸英查慎行皆早成晚遇。阨塞亦相類。宸英以科場事下獄瘐死。慎行爲其弟嗣庭牽連被逮。僅得免死。而式丹亦罹趙晉之獄。晉典江南辛卯康熙五十年鄉試。案發于程光奎吳泌槍替中式。晉被參入獄。式丹往探問。

是夕。晉自縊。蘇撫張伯行奏其死爲十不可信。金典史誣扳式丹名帖致饋。格外用情。疑式丹僕人張大代死。而晉潛逃。又有胖鬚酒飯之說。胖鬚指式丹也。纏訟經年。至康熙五十五年始奉旨結案。式丹得無累。世傳此獄。其辭多異。故據白石草堂存稿爲備著之。式丹性不諧俗。屢與世忤。觀其題徐枋畫贈戴務旂詩。復與宗人源游。是皆當時號爲遺逸。式丹自居何等乎。嘗怪源父子兄弟。明亡後。舉室遷江淮間。及讀此集稱源父爲中齋九叔。乃知其支脈相連。昭穆未遠。源南遷所恃在此也。

七月七日感舊事偶作

留題覓硯亦堪嗤。謳誦何須絕妙詞。記取三言十二字。沿途勒得口頭碑。

動上本。懶結案。准謊詞。宛到底十二字。乃江南傳誦口碑也。樓村詩集二十四

案此詩爲張伯行作。

朱經 燕堂詩鈔四卷

朱經。字□□恭亭。寶應人。撰燕堂詩鈔四卷。自康熙二十五年丙寅。迄三十五年丙子之詩。有辭意甚美者。自云。生于丙午。康熙五年年僅三十。可謂逸才。唯多伊鬱。宿清涼菴題云。野鶴沙鷗逐浪猜。片雲流滯碧雲隈。我來不是求名者。準擬春風看早梅。是時淮揚多水災。督河者靳輔。與士紳齟齬。郎中孫宗彝下獄死。侍讀喬萊奉命來京居住。三十二年以憂卒。經父克簡。順治四年進士。曾以御史巡按福建。久在廢籍。亦同時卒于鄉。萊。經妻父也。其間必有危及門戶之事。悼亡云。汝亡二日泰山頽。北望長安一放哀。

地下若逢應茹歎。嗟然相對不須猜。只一猜字。寓意無窮。除棘逐鴉二詩。其辭更顯。此集別本有作八卷者。

地震行

康熙乙亥四月六日。平陽府臨汾洪洞二縣地震。

入歲四月多風雨。大江以南農作苦。昨聞平陽搖地軸。樑摧瓦裂餘環堵。自辰及酉無停時。道路號泣驚
聲聳。須臾烈火天上來。毒焰焦爛那可數。僵尸腐骨幾千人。不亞長平坑降伍。縱有一二強奔逃。蟻附
喧畏如虎。君不見。春秋二百四十有二年。文襄昭哀之間地震五。方今天子至神聖。九州四夷皆樂土。何
爲西北罹此災。震盪燎原迭賓主。有耳已覺心魂忡。此身豈堪親目覩。我欲乘風上叩閭闔門。試問天心
嗜殺竟奚取。安得重爲斯民整棟宇。燕堂詩

纒絲行

丙子三月

院竹青青半繖籜。黃雲壓壟堪刈穫。反舌無聲雙燕飛。家家綠車施帷薄。嘈嘈似來風雨聲。宛轉鳳尾彈
襪索。大婦辛勤小婦忙。一家大小歡嗷嗷。近聞天子詔下親西征。上將元戎授方略。此時難用魏絳策。整
陳蒐兵期面縛。又聞官家詔下緝戎衣。小民豈得輕司約。但願綠絲無斷縷。絲長萬丈充國橐。今年不似
去年時。縱成羅綺何忍着。燕堂詩

稽宗孟立命堂二集十三卷

稽宗孟。字淑子。號子震。山陽人。崇禎九年舉人。入清由餘杭知縣官至杭州府知府。以廉明好事稱。未

悉卒年。撰立命堂二集十三卷。先曾刻其詩文。故曰二集。凡詩文七卷。小集曰蠡史。曰星路陽秋。曰識小箋。曰詩拇。曰甌樂行舊錄。詞曰酒古董。各爲一卷。文中序記之作不免纖仄。詩則通雅。山陽耆舊頗衆。而宗孟甚有聲名。爲吳偉業激賞。今觀所作。夫亦猶人。不知何以致此高名也。

樂邑頌衣

道左哀鴻未忍看。朔風獵獵起驚翰。饑驅誰解翳桑餓。踵決徒憐東郭寒。挾纈千人歌趙旭。授衣九月見周官。悽惶不忍悲隅泣。四海還期衽席安。立命堂二集四

甲辰王正安輯流民過茶山留壁

茶山之壁木蒼蒼。路滑峯回人面涼。雲母水春千尺瀑。梅花春醉一樓香。問津擬入桃源路。採藥還思勾漏方。最喜桑麻渾太古。莫教海鶴嘆無糧。立命堂二集四

靳應昇 渡河集一卷

靳應昇。字璧星。號茶坡。山陽人。順治十三年以貢生應廷試。不遇。卒于康熙二年。年五十九。撰渡河集一卷。應昇與張養重閣修齡相唱和。嘗刻三子秋心集。稱三詩人。丘季貞爲此集序。謂其怨尤不形于色。愁歎不見于聲。或指其爲人。詩則觸緒生悲。有不勝其掩抑者。兵燹。田無禾。苦雨歎。淮瀆勅諸篇。幾于怨而怒矣。惜稍近率。晚年之作尤甚。篇章無多。蓋不自收拾。脫手卽散去也。

淮無女

順治年十五。是歲當戊戌。十月甫初旬。風聞自京國。長門須女工。下令天下覓。我郡南北衝。傳播說非一。始也皆觀望。逢人卽相詰。有客金陵游。見聞果得實。一傳通國驚。家家咸變色。有女在閨閣。轉盼行若失。父曰計若何。母曰急求匹。日月少遷延。他時悔何及。倘得結其褱。庶幾免乖隔。兄曰勿遲疑。令下在晨夕。弟曰我更聞。官府行事密。搜檢不及防。隣里無容匿。小姑暗攢眉。邱嫂復啣啣。東隣有嬌娃。西隣非親戚。南隣見兒郎。北隣女應適。因此比戶間。作合夜不輟。更奇兩日暄。十九與二十。士夫逮庶民。遑遑如迫逼。豈煩媒妁通。立談六禮畢。廣衢連隘巷。擾攘皆接跡。或則結彩輿。或則巾車出。或則策蹇奔。求配卽頃刻。甚者背負女。登門送入室。寥廓水泊中。搖艇復絡繹。富家饒珠翠。誰容待雕飾。蜀錦及吳綾。不及用剪尺。貧家探空篋。躑躅怨倉卒。欲縫疏布裙。何須理裝積。但使雌得雄。親迎不卜吉。肴核無一陳。況復奏笙瑟。門第未遑詳。甲子未遑息。燕婉歸戚施。老嫗偶弱息。穉女髮未齊。畫眉尙狼籍。安知作羹湯。何能侍巾櫛。矯強嫁於人。愛極翻爲賊。屈指嫁娶時。沸騰將一月。道路肩相摩。都與新郎揖。郡中女既空。採選事仍寂。回視向者忙。顛倒殊可惜。且聞朝命來。原不強追責。胡爲朱陳歎。一切就草率。雖曰無曠夫。婚早多成疾。雖曰無怨女。笑中還復泣。世人亦何愚。聊爲來者述。

渡河集

十月水

十月青霜繁。陽烏喧於暑。黃河水氣驕。汗漫無乾土。淮西有高堰。絲來憑險阻。西風浪拍空。天地皆震

怒。蛟龍不敢眠。搖撼駭失所。浩淼一無涯。飛濤如沸釜。崩騰轉盼間。見者慄雙股。官吏亦何爲。哀鳴徒自苦。徬徨督萬夫。隄防愁不鹽。浸淫魚鼈宮。晝夜連風雨。我聞天下平。五行皆得序。水當歸壑時。何以無安渚。居者憂牆屋。耕者哭禾黍。危哉淮陰城。不灌僅如縷。顧告大司空。治河重合古。疏築紹禹功。應先念淮浦。渡河集

杜首昌 綰翠園詩選一卷 詞選一卷

杜首昌。字湘草。山陽人。諸生。入望園詩社。家有園亭之盛。而性喜游。與高士奇交好。士奇于康熙三十七年序其詩。謂年近七十。未知卒于何年。撰綰翠園詩選一卷。詞選一卷。詩有才語。不免粗豪。七絕頗有作意。登太白樓。秦淮曲。皆可誦。唯以江海之人。而有恭擬灑臺應制之作。又恭題溫王月香亭。應教五排一首。竟不知溫王何人。填詞亦近蘇辛。然有雲在水流之趣。似較詩爲勝。

柳敬亭持筴索書口占贈之

能令千古事長新。一往從何辨假真。天地欲存三寸舌。江湖難老八旬人。綰翠園詩選

丘象升 南齋詩集不分卷

丘象升。字曙戒。號南齋。山陽人。順治十二年進士。選庶吉士。授編修。官至大理寺左署丞。卒于康熙二

十八年。年六十一。事具王士禛所爲墓誌銘。李澄馮景撰傳。撰南齋詩集。刻于康熙三十五年。象升先有桐園雜詠。楚游草。舫齋集。嶺海集。三入燕集。西清焚餘草。七入燕集諸刻。晚年始自訂爲此集。爲詩四百八十五首。初以編修外補瓊州通判。開詞林未有之例。同于遷臣謫官。必有排擠傾陷之者。後改武昌通判。入爲寺丞。終不復原官。傳誌不言其故。或有所劫不敢言也。使他人當之。必且抑塞偃蹇。而象升勤于吏事。其詩深情一往。多友朋酬答之作。一時名士。無不交好。懷人詩六章。獨拳拳于金堡阿字養賢張養重。皆高逸也。平生寄托可知。傳稱其孝于親。與弟象隨齊名。友愛不衰。尤篤故舊。臨沒猶刻故人張虞山養重古調堂集。靳茶坡應昇渡河集。可謂古道。

都市口占

報國松前廟市張。退朝官府雜工商。誰開祖帳毘盧閣。滿院笙歌沸海棠。

毘盧閣左有海棠院

天寶樓開製造新。琳琅時過到烏銀。鮮衣怒馬來如織。賺盡長安富貴人。

梁家園北好盤餐。沿岸垂楊遮畫欄。公子王孫擁歌妓。夜深猶未罷吹彈。

天壇門禁無塵惹。日射琉璃五色瓦。壇中道士不黃冠。東開酒肆西茶社。

金魚池繞柳如烟。隨地氈鋪人醉眠。忽聽衙衙神會過。往觀攘攘競摩肩。

南齋詩集

李時震 去來吟一卷

李時震。字雷中。號侑菴。山陽人。順治十八年進士。康熙十二年。始補內閣撰文中書。逾二年告終養。二十五年服闋赴補。遂乞假歸不再起。卒于四十年。年六十六。撰去來吟一卷。蓋取淵明歸去來之義。其詩淡遠。一如其人。

梅花嶺尋史道隣先生葬處

嶺上梅花千樹橫。笛聲吹徹暮雲平。招魂曾把孤忠葬。感慨偏深弔古情。去來吟

阮晉 自吟亭詩稿二卷

阮晉。字鶴緱。山陽人。監生。入國子監。試得知縣。未及選。卒于康熙三十六年。年六十三。撰自吟亭詩稿二卷。後二十年其子應商始刻之。晉少與閻若璩共學。又學詩于靳應昇。與李挺秀黃申及應昇諸人結望社。家富于田。有水園。山園。益丘草堂。夏雲草堂。皆田莊也。多田園漫興之作。詩筆力追香山劍南。稍傷率易。查慎行序其集。譽爲必傳。無乃過情乎。曾孫葵生。本名芝生。官侍郎。有文譽。撰茶餘客話十二卷。稱晉爲先徵君。阮元爲葵生作傳。亦謂晉與閻若璩同徵。然己未鴻博百八十六人中。無阮晉姓名。俟考。

養蠶謠四首

清明蠶種萌。穀雨蠶種出。家家養蠶忙。不分夜與日。
典盡筒中衣。賣盡倉中穀。采采桑滿筐。一一闌蠶腹。
蠶飢勝已飢。蠶眠不敢語。可憐租稅完。所剩能幾許。

東家女兒啼。西家女兒哭。喫盡後園桑。新絲無半幅。

自吟亭
詩稿上

螟蝗篇

丙寅七月上旬中。滿村滿野皆蝗蟲。丙寅七月下旬中。滿城滿市皆蝗蟲。其初無翅走匆匆。千里百里花
椒紅。依稀將帥統軍戎。問從何來自山東。大毬小毬結爲叢。黃河滾過若飄蓬。遮牆蔽屋密蒙蒙。俄而漸
與簾戶通。鬻衣餼帽窺箱籠。掃除不盡呼兒童。一朝羽翼能高翀。直上層霄塞碧空。黑如煙霧響如風。日
色爲之翳朦朧。路上行人憂忡忡。抱頭似遭急雨同。撲鬚撲面撲雙腫。入人項領芒刺鬣。墜枝壓樹亂芴
芴。西園綠竹變枯桐。指蝗驚訝訊老翁。老翁九十貌尙豐。爲言追溯到鴻濛。未聞如此蝗無窮。朝來急往
視田功。處處驅蝗敲竹筒。揭竿搖幟紛爭雄。誰知蝗衆不可攻。嘉禾一片烏紗幪。須臾莖穗成斷葱。東啼
西哭傷我衷。哭聲直令耳欲聾。吁嗟聊紀褚國公。我賤何由達宸聰。

自吟亭
詩稿上

夏雲草堂紀異

春到暮春春已老。衆卉欣欣日杲杲。田父操豚祝滿篝。共云牟麥收應早。紅雲百朵自西來。萬丈冰山碎